

中國與漢人語訛誤舛錯不相通曉必須頻數赴京專心質習庶能通也今者堪為御前通事者絕無近有天使之來彼此不能通意誠非細故朱良佑非但自儒素習今承國家委勛之意頗亦留心自勉然必累度赴京乃有成就之望其還未以旋又入送禮部如或見之則似有連遣之嫌上教甚當但質正非使命專對之比中朝人雖或有問其欲質吏文華語而來以實答之亦何妨於事體也若間數三行次則其成業必晚難冀其速就從謹思議○憲府啓宋叔瑾等事傳曰宋叔瑾高自謙李嗣宗雖各以身累見罷然必已懲艾不可改也○以吳準為戶曹參判尹豐亨為江原道觀察使蘇逢為司諫院司諫朴世恭為司憲府持平金祺為正言○辛亥憲府啓前事不允○北方南方良方異方有氣如火○壬子傳于政院曰世子書筵時書筵官等進戒之辭前則書啓而其後中廢不啓近者更命書啓者自下進戒之辭及世子顧問之說無以知之故也及今見進戒之辭皆為切實而其中金遂性之言尤為至切而嘉美予反覆見之雖聖賢之言不踰於此大抵儒者則有所疑慮與朋友相為問難其學得以易通尊位則不有講論誰與解疑昔者文宗有所疑事或親臨侍講院相與論難至今以為美談允為學之